

Inatsisartut Suleriaasianni § 33, imm. 1 naapertorlugu Siulittaasoqarfimmut ilaasortat Inatsisartut aalajangiiffigisassaattut siunnersuummik imaattumik saqqummiussa qarput:

Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaannik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siulittaasoqarfimmut ilaasortat)

Tunngavilersuut:

Inatsisartut isumaqatigiinniarneri ukiuni qulilinni Namminersornerulluni Oqartussaanerup eqquneqarneraniilli radiukkut malinnaavigineqarsinnaasimapput. 2016-imili upernaakut ataatsimiinnermiit tamanna ajornarsimavoq.

Innuttaasut qinikkat aqqutigalugit oqartussaaqataanerat tunngavigalugu naalakkersuinikkut ingerlatseriaatsitsinnut inatsisiliortussatut qinikkat oqallinnerisa malinnaavigisinnaanissaannut innuttaasut periarfissaqarnissaat aallaaviulluinnarpoq. Tamanna aamma qinikkanik, naalakkersuinikkut suliniaqatigiiffinnik partiinik naalakkersuinikkullu ingerlatsinermik ingerlanneqartumik innuttaasut naliliisinnaanissaannut tunngaviit ilagaat.

Tamannarpiaq pissutigalugu Inatsisartut ataatsimiittarfiat tusarnaarusuttunut ammasuuvoq: Immikkut pisoqartillugu isumaqatigiinniarneri matoqqasumik ingerlanneqarsinnaanerat Inatsisartut Suleriaasiat naapertorlugu akuerineqarsinnaavoq, aallaavilli unaavoq innuttaasut kikkulluunniit periarfissaqassammata Inatsisartut ataatsimiittarfiannut iserluni Inatsisartut oqallinnerisa malinnaavigisinnaanissaannut.

Periarfissarli tamanna piviusumik Nuummi innuttaasunuinnaq ammavoq.

Radio ukiut ingerlanerini nalinginnaasumik innuttaasut Inatsisartut ataatsimiittarfianni pisunik malinnaanissaannut periarfissatuaasimavoq, tamatumunngali periarfissanik allanik piviusunik suli peqarani.

Inatsisartut oqallinneri ukiuni kingullerni Inatsisartut nittartagaatigut tusarnaarneqarlutillu isiginnaarneqarsinnaasimagaluarput, periarfissarli tamanna aamma killeqarpoq: Nunatsinni innuttaasut tamarmik internettimut periarfissaqanngillat attaveqaatilluunniit ima sukkaatsigalutik Inatsisartuni oqallinnerit toqqaannartumik malinnaavigineqarsinnaasaratik. Taamatuttaaq toqqaannartumik qarasaasiatigut attaveqaatinut akigitinneqartoq internettikut Inatsisartut oqallinnerinik malinnaanissamut inuppassuarnik mattussereerpoq.

Inatsisartut oqallinneri taamatuttaaq tv-kkut kanalimi KNR2-mi (assitaqanngitsumik) tusarnaarneqarsinnaapput, malinnaaniaraannili immiini piumasaqaataavoq TV-p eqqaaniinnissaq – ulluuneranili ikittuinnaat taamaaliortarunarput.

Ullumikkut KNR pisussaaffeqanngilaq Inatsisartut isumaqatigiinniarnersa aallakaatittuarnissaannut, taamaalillunilu KNR-ip nammineq aalajangersinnaallugu isumaqatigiinniarnert aallakaatissanerlugit imaluunniit naamik.

Aallakaatitsisanginnerli Inatsisartunut – taamalu aamma taakku siulittaasoqarfiannut – ajornartorsiummik pilersitsivoq: Qinikkat inatsisiliortut oqallinnerinik malinnaanissamut nunatsinni innuttaasut tamarmik pitsaasumik – akikitsumik, ingerlalluartumik pisariitsumillu – malinnaasinnaanissaat qanoq qularnaarsinnaavarput?

Oqaatigineqareersutut radio ukiut ingerlanerini nalinginnaasumik innuttaasut Inatsisartut ataatsimiittarfianni pisunik malinnaanissaannut periarfissatuaasimavoq, tamatumungali periarfissanik allanik piviusunik sulii peqarani.

Tamanna tungavigalugu siulittaasoqarfiup pisariaqartissimavaa siunnersuutigissallugu Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaanik sulissuteqaqqullugit Naalackersuisut peqquneqarnissaannik.

Ataatsimiinnerit aallartinneranniit naammassinissaannut aallakaatinneqartarnissaannik KNR-ip pisussaaffilerneqarnissaa siunertarineqanngilaq, taamaallaalli ”siumut aalajangersarneqareersumik annertussusilimmik”. Ulluni ataasiakkaani ataatsimiinnerit assersuutigalugu 80 %-iisa aallakaatinneqartarnissaannut pisussaaffilerneqarnikkut assersuutigalugu KNR-ip aallakaatitsinerit unitsikkallartarsinnaavai ullup qeqqanut radioaviisi aallakaatinniarlugu, imaluunniit ualikkut piffissaq aalajangersimasoq aallakaatitsinerup unitsinnissaanut, ulloq taanna ataatsimiinnerup nalinginnaasumit sivisunerunera apeqqutaatinnagu.

Siunnersuut assigiinngitsunik timitalerneqarsinnaavoq.

Periarfissat ilagaat Inatsisartut isumaqatigiinniarnersa toqqaannartumik radiukkut aallakaatinneqartarnissaasa KNR-imik naammassisassat pillugit isumaqatigiissummut ilaatinneqalernissaat. Naalackersuisut siusinnerusukkut ersersereerpaat inatsisartuni isumaqatigiinniarnert toqqaannartumik radiukkut aallakaatinneqartarnerat KNR-imik naammassisassat pillugit isumaqatigiissuteqarnermut ilanngunneqarsinnaanissaa pissusissamisuussasoq¹.

Radiukkut tv-kkullu aallakaatitsisarneq pillugu Inatsisartut inatsisaanni § 28, imm. 1-imi aalajangersarneqarpoq Naalackersuisut KNR-ilu ukiunut sisamanut atuuttussamik naammassisassat pillugit isumaqatigiissuteqartassasut. Naammassisassat pillugit isumaqatigiissut atuuttoq piffissamut 2015-imi januaarip ulluisa aallaqqaataanniit 2018-imi decembarip ulluisa 31-annut isumaqatigiissutaavoq.

Siunnersuut KNR-imut naammassisassat pillugit isumaqatigiissutikkut timitalerniarneqassapput aporfissat ilagaat taamaaliornikkut Inatsisartut isumaqatigiinniarnert aatsaat 2019-imiit aallartittumik malinnaavigineqarsinnaalissammata.

Periarfissaq alla tassaasinnaavoq inatsisissatut siunnersuusionerq, radiukkut tv-kkullu aallakaatitsisarneq pillugu Inatsisartut inatsisaanni aalajangersakkamik ilanngussilluni Inatsisartut isumaqatigiinniarnersa toqqaannartumik aallakaatitarnissaannik KNR-imik pisussaaffiliisumik.

¹ UKA 2003/41-mut akissuteqaat

Siulittaasoqarfik naliliivoq taamatut aaqqiinikkut 2018-imiit aallartittumik isumaqatigiinniarnit aallakaatittarnissaannut KNR pisussaaffilerneqarsinnaasoq.

Siulittaasoqarfiup soorunami eqqumaffigaa KNR pisortat suliffeqarfiutigimmassuk namminersortoq, KNR-ilu eqqarsaatigalugu nalinginnaasumik ingerlatsinermut naalackersuinikkut akuleruttoqartannginnissaa tunngavigineqartussaammat, KNR-ip kiffaanngissuseqarnera, taamalu aamma radiukkut tv-kkullu aallakaatitsisarfitut pisortanit aningaasalersorneqartut KNR-ip tutsuiginassusiata tunngavia tamarmi, qularnaarniarlugu. Taamatut tunngavissaqarnerup malitsigisaanik suliffeqarfiup naqisimaneqarani aqqissuisinnaaneranut aallakaatitarisartagaanulluunniit naalackersuinikkut akuleruttoqarsinnaanngilaq.

Siulittaasoqarfiullu nalilerpaa taamatut nalinginnaasumik ingerlatsinermut akulerutinnginnissamik tunngavissaqarneq matumani aalajangiiffigisassatut siunnersuutip timitalerneqarnissaanut aporfiunngitsoq. Aalajangiiffigisassatut siunnersuutip taamaallaat siunertaraa nunatsinni qinikkat inatsisiliortut oqallinnerinik malinnaasinnaannissaminnut inuttaasut malinnaasinnaanerisa qularnaarneqarnissaa, nunatsinni inuttaasut qinikkat aqutugalugit oqartussaqaataanerisa tunngavigisaanut ikorfartuutit.

Aalajangiiffigisassatut siunnersuutip taamaalilluni siunertarinngilaa partiimi sumi inissisimaneq tunngavigalugu naalackersuinikkut immikkut soqutigisat siuarsarneqarnissaat, taamaattumillu KNR-ip tutsuiginassusianik ulorianartorsiortitsisinnaanani.

KNR pisussaaffeqareerpoq nalunaarutit upalungaarsimanermut pingaarutillit kiisalu inuiaqatigiinnut paasisutissiilluni nalunaarutit inuttaasunut nalinginnaasumik soqutiginarut aallakaatinneqartarnissaannut. Pisussaaffik taanna radiukkut tv-kkullu aallakaatitsisarneq pillugu Inatsisartut inatsisaanni aalajangersarneqarsimasoq², pisussaaffimmit matumani KNR-imut peqqussutaasussatut siunnersuutigineqartumit assigiinngissuteqangaanngilaq.

Pisortanut aningaasatigut allaffissornikkullu kingunerisassai:

Pisortanut aningaasatigut kingunerisassaanut siunnersuutip qanoq timitalerneqarnera apeqqutaassaaq.

KNR ullumikkut FM-ikkut mellembølgikkullu radiumut ataasiinnarmik kanaleqarpoq. Naalackersuisut kissaatigineqartanngippassuk ataatsimiinnerit nalaanni akunnerni marlussunni Inatsisartunit aallakaatitsisoqartannginnissaa, FM-ikkut kanalimik ataatsimik kanalimik marlunnilluunniit pilersitsisoqarnissaa aqqiissutaasinnaavoq.

Naalackersuisut ilisimatitsissutigaa taamatut aqqiisoqassappat kanalimut ataatsimut pilersitsinermut aningaasartuutit 8 mio. kr.-it missigissagaat kanalimullu marlunnut 15 mio. kr.-it missigalugit³. Taakkununga ilanngunneqassapput ukiut ingerlatsinermut aningaasartuutit kanalimut ataatsimut 800.000 kr. missaat kanalimullu marlunnut 1,5 mio. kr.-it missaat.

Aalajangiiffigisassatulli siunnersuut aamma timitalerneqarsinnaassaaq FM-ikkut kanalit amerlinngikkaluarlugit taamalu aamma nunatta karsianut aningaasartuutaanngitsumik. Tamatumani taamaallaat piumasaqaataavoq KNR-ip aallakaatitsivigisartagaata ilaata ataatsimiinnerit nalaanni Inatsisartut ataatsimiittarfiannit aallakaatitsinissanut immikkoortinneqarnissaa.

² § 16, imm. 1 aamma 2.

³ Oqallinnerit kalaallisullu qallunaatullu malinnaavigineqarsinnaassanersut apeqqutaatillugu FM-ikkut suli kanalimik ataatsimik kanalimilluunniit marlunnik pisariaqartitsisoqassanersoq.

Pisortanut allaffissornikkut kingunerisassai eqqarsaatigalugit siunnersuutip qanoq timitalerneqarnissaa aamma apeqqutaavoq.

Naammassisassat pillugit isumaqatigiissutikkut siunnersuut Naalakkersuisut timitalerniassappassuk siunnersuut allaffissornikkut nukissanik atuiffiussanngilaq, ukiut sisamakkaarlugit naammassisassat pillugit isumaqatigiissutip nutarterneqarnissaanut nukissat Naalakkersuisut atortagaasa saniatigut.

Radiukkut tv-kkullu aallakaatitsisarneq pillugu Inatsisartut inatsisaata allanngortinneqarnissaanik Inatsisartut inatsisissaannut siunnersuuteqarnissaq Naalakkersuisut toqqassappassuk allaffissornikkut nukissanik tamatumunnga atuisoqartariaqassaaq. Siulittaasoqarfiup missingerpaa nukissanik pisariaqartitsineq sulisup ataatsip ukiup ataatsip pingajorarterutaanik sulineranit annertunerussanngitsoq (nutserineq, tusarniaaneq inatsisitigullu nalilersuineq ilanngullugit).

Namminersorlutik inuussutissarsiuteqartunut aningaasatigut allaffissornikkullu kingunerisassai:

Siunnersuut namminersorlutik inuussutissarsiuteqartunut aningaasatigut allaffissornikkullu kinguneqassanngilaq.

Innuttaasunut aningaasatigut allaffissornikkullu kingunerisassai:

Siunnersuut innuttaasunut aningaasatigut allaffissornikkulluunniit kinguneqassanngilaq.